

Louis Zschuschen, pa 29 aña a promové Aruba y su turismo

Condecorá pa Gobierno

Apesar cu 1 di April ta dia di gaña, e fecha aki ta representá un dia grandi y special pa Louis Zschuschen.

Sr. Zschuschen, un profesional tur afó a yega for di Corsow y a cuminsá traha dia promé di April 1960 cu "The Coral Strand Hotel". E tempo ey contando cu solamente 46 camber, cu Aruba su turismo apenas gatiando.



Louis Zschuschen

Na aña 1970 e hotel a wordo expandé cu 26 camber mas y nacemento di nomber nobo, esta "Talk of the Town." Cu su entrada den Talk of the Town el a wordo reconocé como un "all-around supervisor."

Como supervisor Sr. Zschuschen semper a conocé un yeno total di e cambernan, specialmente como cliente, e tripulacion di Pan American Airlines. Tumando iniciativa Sr. Zschuschen, como restaurant-manager, a inaugurá e famoso "Moolight Grill" cu tabata e "talk of the day" den decadan di 60 y 70. Tabata na aña 1978 cu Sr. Zschuschen huntu cu Juffr. Jetty Tjung a biaha pa Venezuela pa promové Aruba turisticamente.

Algo masha peculiar ta e hecho cu Sr. Zschuschen personalmente tabata hiba su bishitantenan pa tour rond di nos isla, mirando e hecho cu e ta dominá, pa e tempo aya hopi idioma, incluyendo Chines. Riba terreno social Sr. Zschuschen tabata miembro di "Association of Voluntaries of Aruba" AVA. Na aña 1990 el a ricibí un reconocemento pa servicio boluntario na comunidad siendo miembro tambe di Kiwanis Club of Aruba.

Si mester mencioná un logro y reconocemento grandi di parti di Talk of the Town na Sr. Zschuschen ta e hecho cu un sala den hotel a wordo yamá na su nomber, "Louis Room"

Sr. Zschuschen a retirá na aña 1996 pa motibo di salud, despues di 29 aña di servicio, pero te dia di awe ta ricibí yamada y carta for di afó di amistadnan cu el a haci durante su carrera largo di 29 aña den Aruba su industria turístico.